

鄭
堂
讀
書
記

鄭堂讀書記卷五十一

烏程周中孚撰

子部九之下

譜錄類二

草木鳥獸蟲魚

玉藥辨證一卷

津逮祕書本

宋周必大撰

必大仕履見職官類

四庫全書存目上有唐

昌二字蓋以次行標曰唐昌玉藥花而加之也唐人甚重玉藥故唐昌觀有之集賢院有之翰林院亦有之皆非凡境也宋子京劉原父宋次道皆疑爲瓊花平園因作是書以辨證之首列康駢劇談

錄一則次及嚴休復以下各家之詩二十三首附以諸家小說七則并楮音陳花出處一則既爲之跋又續添楊巨源詩一首晁補之詞一闕及風俗雜志瓊花玉藥渾而爲一說一則又爲之跋本載其全集中毛子晉錄入祕書復跋其後

洛陽牡丹記一卷 百川學海本

宋歐陽修撰

修仕履見詩類

四庫全書著錄讀書志書

錄解題通考宋志俱作牡丹譜又無洛陽二字蓋別據一本詳見周平園歐集考異此記蔡君謨書之盛行于世文忠自爲跋尾編入外集者也當時牡丹出丹州延州東出青州南亦出越州而出洛

陽者爲天下第一文忠初調洛陽從事見其俗重牡丹因作是記凡花品敘花釋名風俗記三篇皆取其特著者二十四品述其得名之由及游賞進御種植諸事敘述雅馴似在君謨荔枝譜之上說郭墨海金壺均收入之

天彭牡丹譜一卷

說郭本

宋陆游撰

游仕履見傳記類

四庫全書存目牡丹在中

州洛陽爲第一在蜀天彭爲第一放翁因仿歐陽公洛陽記述爲是譜亦分三篇一曰花品序列紅花二十一品紫花五品黃花四品白花三品碧花一品未詳三十三品二曰花釋名述花名之所自

來三曰風俗記述其游賞栽植之事凡洛花見于
歐記者天彭往往有之此不載載其著于天彭者
合是二書以觀之而牡丹之記載備矣本載渭南
文集四十中故諸家皆不著錄至陶氏始錄入說
郭云

揚州芍藥譜一卷 百川學海本

宋王觀撰

觀字達叟如皋人熙寧中嘗以將仕郎守大理寺丞知揚州江都縣事

四庫全書著錄書錄解題通考宋志所載俱無揚

州二字又三書所載尙有劉貢父

敬孔常甫 武仲

二種與此種皆述揚州所產芍藥花之盛亦皆無
揚州二字也劉孔二譜久已亡佚其大略僅見于

陳氏全芳備祖前集及嘉靖維揚志中是譜卽因
劉譜所列三十一品改其妒裙紅一品爲妒鶯黃
而增入八品仍依劉譜分上之上六品上之下二
品中之上六品中之下四品下之上四品下之中
四品下之下五品新收者不列等前爲總論末爲
後論敘述比劉譜較詳至維揚志所列孔譜之三
十三品與劉譜間有不同大約各以意爲更改今
是譜獨存可援以爲定評矣說郛墨海金壺均收
入之

范村梅譜一卷

百川學海本

朱范成大撰

成大仕履
見傳記類

四庫全書著錄書錄解

題文獻通考俱合菊譜作二卷然前有自序實專
爲梅譜而作不得併合爲一也石湖有園在居第
之側號范村所錄梅花凡十二種每種爲一則蓋
據吳郡所產其別業之所植者記之非謂梅類止
于此也然梅譜則始于是編云末有所作後序
說郭墨海金壺均收入之

水蜜桃譜一卷

慈雲樓刊本

國朝褚華撰

華字文洲
上海人

上海水蜜桃以甘而多汁

故名水密其種或云自燕或云自汴疑莫能明也
前明時出顧氏露香園中今則幾盈一邑其佳者
以李氏吾園爲最其次產右營游擊署北與露香

園接壤下者產西門城壕及諸處散種者文洲生
長于斯作爲是譜凡二十三則剖晰種類體驗生
植簡而有法質而不俚洵足以追蹤莆陽之荔枝
譜矣文洲歿後李筍香取以付刊屬陳伯雲
爲之序蔣□□趙曾爲之跋

瓊荷譜一卷

寶廉堂刊本

國朝楊鐘寶撰

鐘寶字瑞水上海人

上海之荷實備于瓊隨

其器之大小皆宜不僅陂塘池沼有之也是譜凡
單瓣十大種重臺一種千葉九大種單瓣七小種
千葉六小種大凡三十三種每種各爲說一則以
發明之又藝法六條曰出秧曰蒔蒔曰位置曰培

養曰喜忌曰藏秧其無遺美無諛詞實足爲君子
之花俾色揣稱與同時褚文洲水蜜桃譜均足爲
物產之良譜也前有嘉慶戊辰自序及吳稷堂
省蘭陸秀農慶循二序楊心香光輔題詞並校閱姓
氏

菊譜一卷

百川學海本

宋劉蒙撰

蒙彭城人仕履未詳

四庫全書著錄上有劉氏

二字乃據浙江鮑氏藏本書錄解題所載亦無此
二字蓋據其原書通考不載豈偶遺之耶是本首
列黃花十七條次及白花十五條終以雜色四條
各敘其種類形色而品第之大抵皆中原產也然

據鮑氏本首譜敘次說疑次定品然後及菊名三十六條復以雜記三篇終焉則此乃刪削之本非其原書矣說邪所載亦同前有崇寧甲申自序蓋卽鮑本所謂譜敘云

菊譜一卷

百川學海本

宋史正志撰

正志字志道江都人紹興二十一年進士官至吏部侍郎歸老姑蘇自號

吳門老圃

四庫全書著錄上有史氏二字乃據浙江

鮑氏藏本書錄解題通考宋志所載俱無此二字

蓋據其原書也所錄黃者十三種白者十種雜色紅紫者六種敘述頗略自序稱菊花昔未有譜因姑以所見爲之蓋未見劉氏之譜然劉所譜者北

地之花此所譜者南方之產不害其並存也說邪亦收入之

菊譜一卷

百川學海本

宋范成大撰 四庫全書著錄上有范村二字乃據浙江鮑氏藏本書錄解題文獻通考合梅譜作范村梅菊譜二卷其自序亦稱范村所植止得三十六種悉爲譜之知是本無范村二字者爲左氏之所刪也其書首列定品一則綴云花總數三十有五以品視之可以見花之高下以花視之可以知品之得失次自龍腦以迄桃花凡三十五種每種各敘其形色出產而品評之後附以雜記三則

中亦有遂有三十五種語益知自序三十六種之
六字爲五字之誤非所列有佚脫也謝采伯密齋
筆記病此譜太略不知但記其所有也惟所載一
幹出千朵者南方謂之千頭菊北方謂之滿天星
此至賤之品而反以爲貴殊令人莫解耳末有自
作後序說郭亦收入之

藝菊志八卷

原刊本

國朝陸廷燦撰

廷燦字扶照嘉定人自
崇安縣知縣候補主事

四庫全

書存目扶照家于槎溪之上名花異卉琳琅滿目
而尤喜藝菊徧覓奇種羅植堦墀乃屬王石谷筆
繪爲藝菊圖一時名流題詠殆徧已復廣披博采

集而成志自經史子集言菊者則爲考從來名種
流傳騷人墨客品題者則爲譜藝植灌溉因時得
宜養胎護苗扶弱除害則爲良法其自古迄今或
賦或詩或詞或記諸體無不窮采以爲佳友流芳
晚香增色則有藝文并以藝菊圖題辭附焉其采
輯富博條理秩如藝菊之能事畢矣冠以

聖

祖仁皇帝御製菊賦及九日對菊詩又有康熙戊

戌錢塘王

復禮

序及其所作凡例

金漳蘭譜一卷

說郛本

宋趙時庚撰

時庚號潛齋魏王廷美之九世孫也

四庫全書著錄

作三卷蓋據浙江范氏天一閣藏本此本佚其下

卷而併上中二卷爲一卷倪氏宋志補史部食貨類作

一卷卽據是本載之也是本凡五篇一敘蘭谷質

一品蘭高下一天下愛養一堅性封植一灌溉得

宜大約不及王進叔之譜然互有詳略云前有紹

定癸巳自序據天一閣本末有嬾眞子跋此本亦

佚之

王氏蘭譜一卷 說郛本

宋王貴學撰貴學字進叔臨江人四庫全書存目無王氏

二字蓋據毛子晉刊本倪氏宋志補有此二字卽

據是本也是本凡品第之等灌溉之候分析之法

泥沙之宜四篇後爲紫蘭以下四十條據毛刊本

少第五愛養之地第六蘭品之產二篇而紫蘭以下四十條毛本亦無之大抵皆非完書矣前有淳祐丁未自序及蒲陽葉大有序

羅鍾齋蘭譜一卷

巾箱寫本

明張應文撰

應文字茂實崑山人

茂實以宋趙

時庚

王貴學

二譜尙俱有所未盡故復作是譜以續之凡分三類曰列品曰封植曰雜說每類分條剖析于修事之理極爲詳備且其言近而不支辨而甚密使蓄蘭者按譜消息不啻適越而假以兩轅學刺而度以金針也前有王弇州世貞序爲四部正續彙所不載蓋偶遺之其書本未板行至崇禎戊辰莊繼

光始以藏本屬毛子晉付刊并爲之跋

海棠譜三卷

百川學海本

宋陳思撰

思仕履見目錄類

四庫全書著錄書錄解題

宋志及宋志補俱不載惟焦氏經籍志載之思以海棠一種風姿豔質固不在梅花牡丹花下因采取諸家雜錄及彙次唐以來諸人詩句以爲是編上卷爲敘事中下二卷爲詩然纂輯未能詳盡不稱譜之名目蓋聊以備數典故耳非可以爲種樹之方也前有開慶己未自序說郭亦收入之

荔枝譜一卷

百川學海本

宋蔡襄撰 四庫全書著錄讀書志書錄解題通

考宋志

譜在小說類

所載尙有荔枝故事一卷惟晁氏

作無名氏撰宋志注云不知作者其書蓋久佚矣

荔枝之于天下惟閩粵南粵巴蜀有之閩中惟福州興化泉漳四郡有之君謨家莆陽厯知福泉二郡每得其尤者命工寫生稗集既多因撰是譜分原本始標尤異誌賈鬻明服食慎護養時法制別種類七篇凡三十二品言姓氏尤其著者也言州郡記所出也不言姓氏州郡四郡或皆有也陳氏稱君謨且書而刻之與牡丹記並行

指歐公所撰君謨所書者

閩無佳石以板刊歲久地又溼皆蠹朽至今猶藏其家而字多不完可惜也然是譜又具載所著端

明集中尙完善無闕左氏卽從集本錄入叢書陶
南村說鄂鄧道協荔枝通譜均收入之歐公外集
有書後一篇則僅見于通譜本云

橘錄三卷

百川學海本

宋韓彥直撰

彥直字子溫延安人蘄忠武王世忠
之長子登紹興十八年進士官至龍

圖閣直學士
封蘄春郡公

四庫全書著錄書錄解題通考宋

志俱載之馬氏作一卷字之誤也宋志作永嘉橘
錄蓋其知温州時作故所錄皆温州之產宋志有
永嘉二字尙其舊名考陳肥遯全芳備祖論其不
知有黃巖乳柑則陳氏時已但稱橘錄故以永嘉
境外之物責以遺漏也其書上卷首爲總說次爲

柑名八則橙品一則中卷首為總說次為橘品十八則下卷為種治始栽培植去病澆灌采摘收藏製治八條九則皆敘述詳明而有條理說郭亦收入之

竹譜一卷

漢魏叢書本

晉戴凱之撰

凱之字慶預武昌人

四庫全書著錄隋志

譜系

類

載竹譜一卷不著撰人新舊唐志

農家類

所載始

題慶預名氏崇文目

小說類

書錄解題通考宋志

俱農

家類

俱同宋志作三卷字之誤也是書裒輯竹事皆

四字語有韻類賦頌并自為之注所記種類七十有餘詞既古雅而注中所引諸書古文足以資于

考證百川學海說郛均收入之

筭譜二卷

百川學海本

宋釋贊寧撰

贊寧德清高氏子出家杭州龍興寺吳越王錢鏐署爲兩浙僧統宋咸平

中加右街僧錄卒諡圓明大師

四庫全書著錄讀書志書錄解

題通考宋志俱載之晁氏作僧惠崇撰馬氏則俱存而不論考書中有云愚著物類相感志則是贊寧撰而非惠崇撰明矣書分五類一之名凡十名二之出凡九十八種三之食凡十三則四之事凡六十事五之雜說凡八則前二類皆有注以發明之似是其所自作也大都引證繁富所有古書多今所未見而文筆亦頗雅馴相其體裁當在物類

相感志上也說邠唐宋叢書均收入之

菌譜一卷

百川學海本

宋陳仁玉撰

仁玉字碧棲台州仙居人擢進士第中官禮部郎中浙東提刑入直

敷文閣

四庫全書著錄焦氏經籍志亦載之倪氏

宋志補載陳仁玉蘭譜一卷當卽此書蘭乃菌之

譌也南宋時以州之菌爲上味故碧棲述其鄉之

所產爲此書凡合蕈穉蕈鵝蕈栗殼蕈松蕈竹蕈麥

蕈玉蕈黃蕈紫蕈四季蕈鵝膏蕈十一種每種各

爲敘述一則皆所以盡蕈性而究其用竅其品也

未附解毒之法俾山居者享其美而遠其害云前

有漳南乙巳自序說邠墨海金壺亦收入之

花史左編二十四卷 原刊本

明王路撰

路字仲遵嘉興人

四庫全書存目仲遵生負

花癖故入山經營草堂翦榛搜石得隙地便令童子種花栽竹因簡諸藝植方及所藏書中拈其涉花木者排續爲書凡花之品花之寄花之名花之辨花之候花之瑞花之妖花之宜花之情花之味花之榮花之辱花之忌花之運花之夢花之事花之人花之證花之妬花之亢花之藥花之毒花之似花之變共二十四類類各一卷其所分門類品目以及屬辭俱不脫當時纖佻之習大都本正璩牡丹榮辱志而擴充之其叢雜舛譌又不待言矣

其曰左編蓋以花之辭翰別為右編而未成書也

前有自作小引及萬厯戊寅陳眉公繼儒序

瓶花譜一卷 廣祿笈本

明張謙德撰 謙德字叔益後改名丑字青父號米庵崑山人 四庫全書

存目前萬厯乙未小引蓋其幼時所作凡分品

餅品花折枝插貯滋養事宜花忌護餅入則其敘

述頗為詳雅而于孰是孰非何去何從俱不自為

定評以俟解者擇焉續說郭亦收入之

瓶史二卷 借月山房彙鈔本

明袁弘道撰是編乃其居京師時所作上卷三則

曰瓶花之宜曰瓶花之忌曰瓶花之法下卷十二

則一花目二品第三器具四擇水五宜稱六屏俗
七花崇八洗冰九使令十好事十一清賞十二監
戒前有自序稱邸居湫隘遷徙無常乃以膽瓶置
花隨時插換人家所有名卉一旦遂爲案頭物是
可述也蓋與同時張米庵瓶花譜同一用意而此
編較詳云

二如亭羣芳譜三十卷

明刊本

明王象晉撰

象晉字臺臣自號好生居士山東新城人萬曆甲辰進士官至浙江布政

使

四庫全書存目無二如亭三字明史藝文志

農家類

所載亦同是編分四部十四譜元部凡天譜

三卷歲譜四卷亨部凡穀譜一卷蔬譜二卷果譜

四卷利部凡茶譜一卷竹譜一卷桑麻葛譜一卷
棉譜一卷藥譜三卷木譜二卷貞部凡花譜四卷
卉譜二卷鶴魚一卷而以往哲芳蹤爲首卷前有
小序每譜亦各有小序及首節每種分條標目以
隸事實藝文大都以俞羨長所編唐類函爲本而
參以花鏡圖史諸書其療治一條則又采之本草
綱目或迷其出處或舛其姓名譌漏不可殫數至
天譜雜述灾祥歲譜泛陳節序鶴魚一譜無關種
植亦無關民用皆爲全書之贅是以康熙四十七
年 聖祖仁皇帝有 御定廣羣芳譜之作也
其書前有自序義例及陳繼儒朱國盛毛鳳苞張

鴻四序末有天啟辛酉自跋

御定佩文齋廣羣芳譜一百卷

武英殿刊本

康熙四十七年汪灝等奉

敕撰

謹案是書因

明王

象晉

羣芳譜而廣之併其天譜歲譜爲天時

譜而刪其鶴魚一譜及諸譜中療治一條并更改
其次序移易其種類凡天時譜六卷穀譜四卷桑
麻譜二卷蔬譜五卷茶譜四卷花譜三十二卷果
譜十四卷木譜十四卷竹譜五卷卉譜六卷藥譜
八卷每一物詳釋名狀列于其首次徵據事實統
標曰彙考傳記序辨題跋雜著騷賦詩詞統標曰
集藻其製用移植等目統標曰別錄至若原本首

簡總論雜說中有可采者悉行附載泛者略之並
爲之訂其訛補其漏從此象晉所作之書可以成

置高閣矣冠以御製序文暨劉源等進表及凡

例并附錄象晉原序承幹按源字文濟號天泉康熙進士官至河南巡撫

北墅抱瓮錄一卷江村全集本

國朝高士奇撰士奇仕履見春秋類四庫全書存目康熙

己巳江村告歸有別業曰北墅日處其中雜荒圃
穢修植竹樹分畦種菜手自灌溉因疏墅中花竹
草木果蔬藥蔓之屬爲是錄凡二百二十一種大
都采摭王盡臣羣芳譜而參以己見其成書亦易
事也前有康熙庚午自序

釋草小記二卷 通藝錄本

國朝程瑤田撰

瑤田仕履見書類

皆所著釋草之文凡十

六篇并繪以圖所釋多夏小正月令毛詩爾雅之所具一經疏通而證明之而經義頓明繆說立見足以爲多識之一助云

參譜一卷

借月山房叢鈔本

國朝黃叔燦撰

叔燦號牧村昭文人

人參一品自本草所載

外惟唐衡銓文房肆考中著有論說然祇得其大略不能道其詳也牧村嘗館吳門一嚮參家論及參之地產品目種種不同真偽相淆因著是譜凡十五篇其于參之品產形色高下真偽一一區別

而詳載之殊較唐氏說爲備中惟論參性生殺酌用勿忽一條爲醫家而設故不入之醫家類而入之譜錄類云乾隆庚寅自序至嘉慶戊辰張若雲取以刊入叢書牧村子黃廷鑑爲跋其後

禽經一卷

百川學海本

舊題師曠撰晉張華注

師曠晉樂師

華字茂先

著作郎封壯武郡公

四庫全書著錄攷隋志五行類載師

曠書三卷是類雖有相馬經一卷附載其末然此

三卷在三合紀飢穰之下海中仙人災祥書之上

決其非禽經之書也新舊唐志崇文目讀書志書

錄解題通考所載亦俱無禽經惟宋志

小說類

有之

然陸氏埤雅王氏野客叢書所引禽經今本乃皆
不載又僞本中之僞本矣其注引及郭景純爾雅
注顧野王符瑞圖李膺獨志崔豹古今注楊承慶
字統諸書皆在茂先之後此又不善于作僞矣以
左氏所收卽是此本知其僞在南宋之末旣已流
爲丹青今亦不能遽廢焉末附野客叢書二十八
補禽經說當屬左氏所附益說郭唐宋叢書均收
入之

烏衣香牒四卷春駒小譜二卷

袖珍本

國朝陳邦彥撰

邦彥字世南號苑廬海寧人康熙
癸未進士官至內閣學士兼禮部

侍郎

四庫全書存目烏衣香牒分記原故實徵驗

神異寄託別錄藝文散藻八門皆所采燕事春駒
小譜分名類故實神異藝文散藻五門皆所采蝶
事也于古今燕蝶故實披羅殆盡亦堪供詞賦之
需惜其位臻閭部而僅成此幺麼著作不過稍愈
于一物不知者耳兩書之前俱有乾隆戊午駢體
自序蓋距其登第時已三十六年矣

釋蟲小記一卷

通藝錄本

國朝程瑤田撰皆其所作釋蟲之文凡六篇閒繁
以圖其格物之精用心之細由其讀書能旁穿變
通故能別黑白而定一尊也

蟹譜二卷

百川學海本

宋傅肱撰

肱字自翼會稽人

四庫全書著錄讀書志通

考俱載之自翼以蟹之爲物雖非登俎之貴然見于經引于傳著于子史志于隱逸歌詠于詩人雜出于小說皆有意謂焉因益以所見聞次而譜之前爲總論冠諸二篇之首每篇爲一卷上卷自離巢以至考證凡四十二條多采舊文而唐韻一條皆據孫愐原本引入足有資于攷證下卷自孝報以至盪漭搖江凡二十三條則自翼所自記敘述頗爲雅飭後又附以紀賦詠及皮襲美陸魯望詩三條前有嘉祐己亥自序說邪亦收入之

晴川蟹錄四卷後錄四卷

原刊本

國朝孫之騷撰

之騷仕履見書類

四庫全書存目其書

分譜錄事錄文錄詩錄各一卷後錄分事典賦詠
食憲拾遺各一卷皆謂茲物情暢厥理趣名雖述
古意由獨造于養生不爲無助非徒嗜奇愛博而
已也然較之傳自翼之譜高續古之略則有古今
之分矣前有康熙丙申沈釋祖序後錄冠以自作
序蟹一篇

異魚圖贊四卷

函海本

明楊慎撰

慎仕履見禮類

四庫全書著錄焦氏經籍志

地理類

作一卷蓋誤以冊爲卷也升庵以西州畫史

所錄南朝異魚圖名多踳錯文不雅馴因效郭景

純山海經圖贊體作爲贊語以代其圖凡異魚三
卷共八十七種爲贊八十六首附海錯一卷共三
十五種爲贊三十首詞藻淹博吐屬雋永雖不及
郭氏諸贊以方宋子京益部方物略實足以方軌
連鑣也其贊間有自注多未詳核故胡菊潭復爲
之箋云原書前後俱有序跋李雨村刊入函海僅
存其跋別爲之序彙祕笈藝海珠塵均收入之

異魚圖贊補三卷閨集一卷

萬曆戊午刊本

國朝胡世安撰

世安字處靜號菊潭井研人崇禎
戊辰進士官至少詹事入國朝

歷大
學士

四庫全書著錄菊潭既箋楊升庵異魚圖

贊復以其原書尙有所遺因類搜其餘補之凡魚

類一百五十四種爲贊五十七首海錯類三十八種爲贊二十八首閩集一卷則列錄非常之魚恍惚不盡可憑者凡二十八種爲贊二十三首其子璞及門人雷瑄等共爲之注其贊徵據富博詞旨雅馴亦足與楊氏書並傳于世云前有萬厯戊午自引知未登第時所作也函海亦收入之

蟲天志十卷

暢閣刊本

明沈宏正撰

宏正字公路自號非磊落氏嘉定人

四庫全書存目

明史藝文志

小說家類

亦載之是編采摭古今鳥獸蟲

魚事以纂組成書凡分六部曰鬪曰舞曰能言曰傳書曰識字曰奏技每部又共分四十九種每種

先之以原始次之以敘事中列藝文則或具或不具然後終之以贊上極典墳下及稗官野史凡夫蜎飛蠕動之屬說非涉于荒唐言可資夫風雅者靡不綜而輯之眞博物之奇書也其曰蟲天者以人爲倮蟲之長則凡鳥獸蟲魚皆可謂之蟲故取莊子惟蟲能蟲惟蟲能天語以名之也前有同時楊萬里林有麟錢希言三序及其自作凡例

鄭堂讀書記卷五十一

鄭堂讀書記卷五十二

烏程周中孚

子部十之一

雜家類一

雜家之屬上 周至五代

鬻子一卷 墨海金壺本

舊題周鬻熊撰唐逢行珪注鬻熊周文王之師也成王時舉文武勤勞

之後嗣其元孫熊繹受封于楚行珪里貫未詳官華州鄭縣尉 四庫全書著錄

案漢志道家載鬻子二十二篇注云名熊爲周師

自文王以下間焉周封爲燕祖又小說家載鬻子

說十九篇注云後世所加是西漢時卽有二書隋

志道家止載鬻子一卷注云周文王師鬻熊撰新

舊唐志小說類新唐志俱同道家類新唐志又載行珪注

鬻子一卷崇文目道家類讀書志道家類附志諸子通

志道家類書錄解題道家類宋志入雜家類宋志所載皆行

珪注本也惟陳氏別出無注本一卷云漢志凡二

十二篇今書十五篇陸佃所校又于注本下云止

十四篇蓋中間以二章合而爲一故視陸本又少

一篇此書甲乙篇次皆不可曉二本前後亦不同

李巽巖心傳謂劉向父子及班固所著錄者或有

他本此蓋後世所依託也熊旣年九十始遇文王

胡乃尙說三監曲阜時何耶又文多殘闕卷第與

篇目皆錯亂甚者幾不可曉而注尤謬誤

見通鑑攷引竊

謂崇文目及晁陳諸家但知漢志道家有鬻子而不知漢志小說家有鬻子說故皆以二十二篇較其存佚夫道家之鬻子久佚矣今所存者蓋小說家之鬻子說殘本也漢志已稱其後世所加則非周初舊文可知其語淺薄猶之伊尹說之二十七篇師曠之六篇耳

俱見漢志小說家

不足爲異特其篇目

之冗贅恐西漢以前尙無此體而行珪不加辨證具爲注釋此與其全注皆無深義者也然唐以前已有此篇目則固信而有徵矣至是書所載禹七大夫湯七大夫諸人攷僞本陶

潛

聖賢羣輔錄不

引及之或偶未及見此書耳亦不足爲異也前有
行珪原序及永徽四年進表此本從文淵閣本
寫出校梓故冠以提要一篇

子華子二卷

墨海金壺本

舊題晉程本撰四庫全書著錄漢隋唐志崇文
總目俱不載讀書志書錄解題通考宋志儒家始

載之俱作十卷蓋以篇爲卷也是書凡十篇曰陽
城胥渠問曰孔子贈曰北宮子仕曰虎曾問曰晏子
曰晏子問黨曰熱中曰大道曰北宮意問曰神氣皆摘
篇首之字爲目每篇各分章段晁氏稱其傳曰子
華子程氏名本晉人也劉向校定其書按莊子稱

子華子見韓昭侯陸德明以爲魏人旣不合又藝文志不錄子華子書觀其文辭近世依託爲之者也其書有子華子爲趙簡子不悅又有秦襄公方啟西戎子華子觀政於秦夫秦襄之卒在春秋前而趙簡子與孔子同時相去幾二百年其牴牾類如此且多用字說謬誤淺陋攷元豐以後舉子所爲耳陳氏稱家語有孔子遇程子傾蓋贈束帛之事而莊子亦載子華子見昭僖侯一則此其姓字之所從出昭僖與孔子不同時也莊子固寓言而家語亦未可考信班固古今人表亦無之使果有其人遇合于夫子班固豈應見遺也其文不古然

亦有可觀者當出于近世能言之流爲此以玩世
乎余謂兩家辨證此書爲假託當矣而朱子之說
更爲卓識大略謂其詞故爲艱澀而理實淺近其
體務爲高古而氣實輕浮其理多取佛老醫卜之
言其語多用左傳班史中字其粉飾塗澤俯仰態
度但如近年後生巧于模擬變換者所爲不惟決
非先秦古書亦非百十年前文字也今觀其書數
篇與前後三序皆一手文字其前一篇託爲劉向
而殊不類向他書後二篇乃無名氏歲月而皆託
爲之號類若世之匿名書者至其自序出處又與
孔叢子載子順事略相似

孔叢亦其不足信明甚
僞書也

而近歲以來老成該洽之士亦或信之固已可怪
至引其說以自證其姓氏之所從出則又誣其祖
矣見通攷引大按朱子所據係會稽官書版本尙
有後序二篇此本張若雲從 文瀾閣本寫出校
梓冠以提要一篇而無後二篇之序攷明郎兆玉
點評本已無此二篇知兩江總督采進本當屬明
刊而非宋刊也

尸子二卷

問經堂叢書本

周尸佼撰

國朝孫星衍輯

佼晉人秦相商鞅上客鞅死佼逃入蜀漢

志誤作魯人星衍仕履見禮類

前有淵如師序及尸子考證按劉

向別錄謂尸子造此二十篇書凡六萬餘言

史記孟荀

列傳集解引

隋志新舊唐志俱作二十卷卷卽篇也宋

時全書已佚李

淑

書目存四卷中興館閣書目止

存二篇

俱見王氏漢志攷證

我

朝惠松厓

棟

始輯成一卷

任文田

兆麟

又輯成三篇俱未詳善至章逢之

宗

源復刺取書傳輯成一帙寄淵如師補訂爲二卷

可以見古書舛略殊勝惠任兩家所輯矣顧是時

魏徵

羣書治要尙未流入中國所有唐人殘本無

從得見故是猶未美備此汪蘇潭

繼培

所以復爲

之輯錄也淵如師文集有與徐直卿書

墨子十五卷目一卷

經訓堂叢書本

舊題周墨翟撰

國朝畢沅注

翟宋大夫在孔子後沅仕履見目錄

類

四庫全書著錄漢志

墨家作七十一篇隋志

墨家

作十五卷目一卷意林作十六卷蓋併目一卷數

之新舊唐志

墨家

崇文總目

墨家

讀書志

墨家

通志

墨家

考宋志

墨家

所載俱無目一卷通志又有樂臺注

三卷注云唐志不載當考書錄解題止載三卷之

本而不言是樂臺注但云漢志七十一篇館閣書

目有十五卷六十一篇者多訛脫不相聯屬又一

本止存十三篇者當是此本也玉海引館閣書目

則云墨子十五卷自親士至雜守爲六十一篇

亡

篇一本自親士至上同凡十三篇按今本所亡節

用下節葬上中明鬼上下非樂中下非儒上凡八

篇尙存六十三篇疑兩家所引書目譌三爲一抑
或後人據十三卷之本爲六十一卷之本所闕者
取以補入二篇歟至樂注本久亡鄭氏聊存其目
焦氏經籍志亦不過依通志錄入耳今本爲盧抱

經

文昭

翁覃溪

方綱

孫淵如

星衍

三家互校略有

端緒秋帆始集其成因徧覽唐宋類書古今傳注
所引正其譌謬又以知聞疏通其惑以爲之注并
補目一卷于後以符隋志意林之舊按墨子書爲
孟子所闕故其說不行于世若覽其文亦辨士也
親士修身經上經下及說凡六篇皆墨子自著經
上下略似爾雅釋詁文餘篇稱子墨子耕柱篇并

稱子禽子則是其門人小子記錄所聞而備城門
諸篇具古兵家言有實用焉其于儒家殊有近理
亂真之處孟子之辭而闢之豈得已哉惜舊本脫
誤難讀而秋帆悉能引據羣籍匡正其失又其古
字古言通以聲音訓故之原豁然解釋是當與高
注呂覽淮南張注列子楊注荀子諸書並傳于世
無疑矣卷首有乾隆癸卯秋帆序及篇目考末有
淵如後敘

鬼谷子三卷

石研齋刊本

梁陶宏景注宏景字通明丹陽秣陵人齊高帝作
相引爲諸王侍讀除奉朝請永明十
年上表辭職賜以束帛梁大同二
年卒贈中散大夫謚貞白先生四庫全書著

錄漢志不載隋志

縱橫家

始載鬼谷子三卷皇甫謐

注注云鬼谷子周世隱于鬼谷又載三卷樂壹注

新舊唐志

縱橫家

俱載鬼谷子二卷蘇秦撰又三卷

樂壹注又三卷尹知章注則已無皇甫注矣中興

書曰讀書志書錄解題

縱橫家

通志

縱橫家

俱載宏景

注三卷宋志

縱橫家

止載三卷不言何人所注當卽

陶注本也而樂注尹注則已無傳本矣按是書雖

不載于漢志而漢時久已流傳如史記太史公自

序云故曰聖人不朽時變自守虛者道之常因者

君之綱也索隱曰此出鬼谷子遷引之以成其章

故稱故曰也說苑善說篇引鬼谷子凡四行蘇秦

列傳稱蘇秦東師事于齊而習之于鬼谷先生法
言淵騫篇云儀秦學乎鬼谷術而習乎縱橫言論
衡答佞明雲兩篇亦皆言鬼谷先生事是則當時
實有其人與其所著書而二唐志竟題爲蘇秦撰
者非也王厚齋玉海及漢志攷證俱證其卽漢志
縱橫家之蘇子三十二篇更爲不確觀後漢王符傳
李注引蘇子一條及太平御覽引蘇子二條其文
與是書不類則鬼谷子之非蘇秦書明矣是書卷
上爲捭闔反應內捷抵巇凡四篇卷中爲飛箝忤
合揣篇摩篇權篇謀篇決篇符言凡八篇又有轉
丸肱亂二篇皆亡卷下爲本經陰符七術及持樞

中經凡三篇柳子厚嘗稱劉向班固錄書無鬼谷子鬼谷子後出而險整峭薄恐其妄言亂世難信尤口者晚乃益出七術怪謬益甚其言益奇而道益陋使人猖狂失守而易于陷墜見辨鬼谷子篇來鵠亦稱鬼谷子昔教人詭給激訐揣測儉滑之術悉備于章旨六國時得之者惟儀秦而已如捭闔飛箝實今之常態是知漸漓之後不讀鬼谷子書者其行事皆若自然符合也見晁氏引然則欲知鬼谷子者觀二子之言略盡矣陶注至宋代始出晁氏引唐志以爲尹知章注未知孰是晁氏誤也唐志但云尹知章注不以陶注爲尹注也前有嘉慶乙丑秦

敦父

恩復

序又引晁氏去之且謂宋時已兩存其

說蓋爲周琴厓

廣業

跋所遊移也然其謂琴厓跋

詞頗博辨亦憑虛臆言絕無左證則亦不以爲然

矣敦父以錢氏述古堂本爲主參以道藏本并刺

取羣書考訂譌謬而梓行之冠以篇目考殿以附

錄盧抱經

文昭

阮雲臺

元

又俱爲之跋

慎子一卷

墨海金壺本

周慎到撰

到越人與孟子同時

四庫全書著錄按漢志

法家

載慎子四十二篇注云先申韓申韓稱之隋志

法家

作十卷新舊唐志

法家

俱同注云滕輔注崇文目

法家

作一卷原釋云三十七篇讀書附志

諸子類

書錄解

題法家通考法家宋志法家亦俱作一卷王厚齋漢志攷

證稱漢志四十二篇今三十七篇亡惟有威德因

循民雜德立君人五篇滕輔注據此知崇文目原

釋爲陳氏所引當有脫字斷不止云三十七篇也

其書雖止存五篇而滕注尙存陳氏稱今麻沙刻

本纔五篇固非全書也而不言有滕注此本篇第

仍宋之舊已無滕注且其文亦不全然則陳氏王

氏所稱之本久無流傳矣此爲明人所輯錄僅存

二葉今館臣從意林采掇十二條通考采掇十八

條附列于後始得成帙張若雲從 文瀾閣本寫

出校梓冠以提要一篇攷荀子非十二子篇子慎

子則與田駢並非之曰尙法而無法下修而好作
上則取聽于上下則取法于俗終日言成經典及
糾察之則倜然無所歸宿不可以經國定分然而
其持之有故其言之成理足以欺惑愚眾其天論
篇又曰慎子有見于後無見于先有後而無先則
羣眾無門楊倞注云慎到本黃老之術明不尙賢
不使能之道此皆指其全書言之蓋實能綜道德
名法而自成一子以爲申韓之先聲者今則其書
已佚十不存一然所說尙明白純正統本質末大
略本道而附于情主法而責于上非盡屬刑名家
言也又案太平御覽引慎子曰昔者天子手能衣

而宰夫設服足能行而相者導進口能言而行人稱辭諺云不聰不明不能爲王不瞽不聵不能爲公云云今是本不見其文亦當屬亡篇所有也

鵠冠子三卷

學津討原本

宋陸佃解

佃字農師山陰人擢進士累官鄆州教授徽宗時爲尙書左丞

四庫

全書著錄漢志作一篇注云楚人居深山以鵠爲

冠師古曰以鵠鳥羽爲冠隋志新舊唐志崇文目

書錄解題宋志俱作三卷讀書志通志

俱見雜家類

俱

作八卷晁氏云唐韓愈稱愛其博選學問篇而柳

宗元以其多取賈誼鵬賦非斥之按四庫目鵠冠

子三十六篇

按誤衍三字

與愈合已非漢志之舊今書

乃八卷前三卷十三篇與今所傳墨子書同中三卷十九篇愈所稱兩篇皆在宗元非之者篇名世兵亦在後兩卷有十九論多稱引漢以後事皆後人雜亂附益之今削去前後五卷止存十九篇庶得其真其辭雜黃老刑名意皆鄙淺宗元之評蓋不誣據此知其雖載八卷之本而仍刪之爲三卷也凡博選著希夜行天則環流道端近迭度万王鈇秦鴻泰錄世兵備知兵政學問世賢天權能天武略王十九篇漢志作一篇者蓋以卷爲篇或尙未分爲十九篇後人或有所附益而以己意分其篇數加以篇名并釐爲三卷歟其書述三才變通

古今治亂之道雖雜黃老刑名而要其歸宿時若散亂而無家者然其奇言奧旨亦往往而有也故昌黎頗道其書而晁氏以柳評爲不誣陳氏以柳說爲長胥失之矣農師之解惟陳氏明載之其解但釋其可知者而其不可考者輒闕之究未免簡略云此本前有農師自序並錄昌黎讀騁冠子一篇又冠以提要一篇十子全書所收爲明朱養和集評之本首行卽綴韓愈評陡起甚闕美八字其他可不必論矣 武英殿聚珍版亦收入之

公孫龍子三卷

墨海金壺本

周公孫龍撰宋謝希深注

龍字子兼趙人游平原君趙勝家 希深里貫

宋四庫全書著錄漢志名家作十四篇隋志不載

詳新舊唐志名家讀書附志諸子類書錄解題名家通考名家

俱作三卷崇文目名家通志名家宋志名家俱作一卷鄭

氏云舊十四篇今亡八篇陳氏云今書六篇首敘

孔穿事文意重複今觀是本凡跡府第一白馬論

第二指物論第三通變論第四堅白論第五名實

論第六當出于後人所敘次斷不截然亡其第七

以下八篇也然即其所存六篇核之大旨欲綜覈

名實而恢詭其說務為博辨楊倞荀子注所謂曲

說異理不可為法也修身篇堅白同異注呂東萊稱告子彼

長而我長之彼白而我白之斯言也蓋堅白同異

之祖孟子累章辨析歷舉玉雪羽馬人五白之說
借其矛而伐之而其技窮見漢志陳直齋亦稱其
爲其說淺陋迂僻不知何以惑當時之聽云新舊
唐志俱有陳嗣古注一卷賈大隱注一卷今皆不
傳惟謝注尙存諸家書目皆不載或所據者謝注
本而不及詳耳然原書猶能以詞勝理希深詞不
及龍而欲伸龍之理宜其益趨淺陋矣前有自序
不具年月或尙在鄭氏之後爾

呂氏春秋二十六卷 經訓堂叢書本

舊題秦呂不韋撰實其賓客之所集也

不韋陽翟人莊襄王

時自丞相封文信侯始
皇尊爲相國號稱仲父

四庫全書著錄漢志作

二十六篇篇卽卷也隋志所載二十六卷高誘注
新舊唐志崇文目讀書志通志宋志俱同書錄解
題作三十六卷通考作二十卷皆字之誤脫耳是
書首爲十二紀每紀各分五目終以序意次爲八
覽各分八目惟首一覽止七目次爲六論每論各
分六目大凡一百六十篇漢志惟舉其十二紀八
覽六論之數也其以月紀爲首故以春秋名書十
二紀篇首與月令同書成于始皇八年有序意篇
可證而太史公自序及漢書遷傳載報任安書俱
云不韋遷蜀世傳呂覽蓋欲遷就蒙難著書之意
而非其實也方希直遜志齋集有呂氏春秋篇稱

不韋以大賈乘勢市奇貨致富貴而行不謹其功業無足道者特以賓客之書顯其名于後世況乎人君任賢以致治者乎然其書誠有足取者其節喪安死篇譏厚葬之弊其勿躬篇言人君之要在任人用民篇言刑罰不如德禮達爵分職皆盡人君之道切中始皇之病其後秦卒以是數者僨敗亡國非知幾之士豈足以爲之哉第其時去聖人稍遠論德皆本黃老書出于諸人之所傳聞事多舛謬而其時竟無敢易一字者豈畏不韋勢而然耶余謂希直所論能挾作者之旨高續古子略黃東發日鈔所未見及者也誘所注書如孟子章句

孝經解久佚不傳國策注亦非足本唯此書及淮南子注最爲可信其注二書亦間有不同此蓋隨文生義或又各依先師舊訓爲解故錯而不相害歟前有誘自序末有朱元祐壬申後三年鏡湖遺老跋不著名氏當記于紹聖乙亥云鎮洋畢秋帆撫豫時取元人大字本以下八種悉心校勘盧抱經等又各有所訂正遂據以付梓冠以乾隆己酉新校正序及附考並新校所據舊本審正參訂姓氏其附載馬端臨曰一則卽通考所載晁氏曰一則張冠李戴莫此爲甚而當時參訂十二人中竟無有爲之審正者豈亦畏其勢而然耶別有明雲

開宋邦久等校刊本前有王弼州序秋帆所據舊本內有宋啟明本注云不刻年月與此本相合而其名各異或邦久等又取啟明本而重刻之耳

呂子校補二卷

清白士集本

國朝梁玉繩撰

玉繩字曜北號諫庵錢塘人

諫庵爲畢秋帆檢

讎呂氏春秋既授梓人未及覆審鐫成重讀又得

賸義二百六十餘條因纂次爲二卷已刻者不錄

學者讀畢本呂覽當取是書以訂正之惟是呂氏

春秋之稱史記表傳漢藝文志桓譚新論

文選答臨淄侯

腹注

禮運鄭注及高

誘

序俱同或稱呂覽者本于

太史公自序及漢書邈傳載報任安書俱云不韋

遷蜀世傳呂覽也諫庵若欲省文正可稱呂覽校補耳乃本不韋傳贊語而稱呂子校補此明人刻書之陋習何可襲之

許慎淮南子注一卷附淮南畢萬術一卷問經堂叢書

漢許慎撰

國朝孫馮翼輯

慎仕履見五經總義類馮翼仕履見別

史類前有鳳卿序按漢志載淮南內二十一篇隋志

新舊唐志俱有許注淮南二十一卷卷卽篇也舊

志載淮南商詁二十一卷止注云劉安撰脫許慎

注三字讀書志書錄解題通考俱有許慎注而無

高誘注宋志則兼有之陳氏稱今本旣題許慎記

上而詳序文則是高誘不可曉也竊謂許注至宋已佚晁陳兩家蓋誤以高注爲許注陳所見本又誤題許慎記也兩家著錄最富豈俱有許注而反無高注之理馬氏惟晁陳是從宜其不爲之別白矣魏晉以來高許兩注並行于世故李善司馬貞釋立應馬總殷敬順陸德明等采摭許注不減于高注許所據淮南本多異于明人刻本鳳卿輯錄許注于諸書徵引有淮南正文者則并附記所出而以明本攷其異同至不引正文而專引注者則取今本正文依分篇次其未審者五事附錄篇末弗爲臆定也其矜慎也至矣漢書本傳謂淮南內

書二十一篇外書甚眾又有中篇八卷言神僊黃

白之術按隋志

五行家

引梁有淮南萬畢經淮南變

化術各一卷淮南中經四卷亡中經或卽中篇而

卷數不符諸書所引皆稱萬畢術新舊唐志

五行家

載之亦俱稱萬畢術太平御覽徵引至數十事其

正文多四言爲句注文乃悉言之淮南好方技後

世或依託其名以成書未必萬畢卽淮南外書茲

卽附錄于後比于外書遺意

桓子新論一卷

問經堂叢書本

漢桓譚撰

國朝孫馮翼輯

譚字君山沛國人光武時徵待詔後拜議

郎給事中出爲六安丞

按後漢書本傳載君山著書言當世

行事號曰新論其分篇有本造王霸求輔言體見
徵譴非啟脂肱蔽正經識通離事道賦辨惑述策
閔友琴道凡十六篇隋志新舊唐志俱作十七卷
蓋依十八篇爲卷並目錄爲十七耳

古書多列目一卷隋志中

甚多讀書志書錄解題通考宋志皆不著錄則其亡
軼當在北宋時鳳卿從羣書所徵引輯成一卷于
陶南村說邪所引二十七事其書不足據故未采
錄蓋其慎也琴道篇有文選注足據故凡雍門與
孟嘗語及君山論樂事皆可彙爲一篇以肖其舊
餘諸篇目昔人徵引其詞未嘗顯標其題概不臆
爲分列以蹈武斷之弊此輯錄之最善者也前有

鳳卿序及攷證目錄一篇

天祿閣外史八卷

漢魏叢書本

舊題漢黃憲撰

憲字叔度慎陽人舉孝廉不就天下號曰徵君

四庫全

書存目據朱虬庵湧幢小品李厚德戒庵漫筆張

念難雲谷臥餘所記確爲嘉靖之季崑山王舜華

逢年

所僞託前有嘉靖二年王守溪

整

序及晉謝

安唐田宏陸贄及翼聖江氏

不著何時人

總評亦皆一

手所僞撰也其書凡賓韓文二十一篇賓魯文十

三篇賓齊文五篇賓魏文十一篇賓秦文十四篇

賓晉文十四篇賓蜀文十四篇賓楚文十篇大凡

一百有二篇每篇各有標目後閒有宋韓洎贊亦

偽託也其文多記叔度遊說各國之事稱爲徵君
雖竭力規仿戰國策而實皆荒唐凡鄙之詞蓋與
姚叔祥僞本於陵子同心勞日拙者而此卷帙更
爲繁富宜當時一二人外皆爲所欺也

典論一卷

問經堂叢書本

魏世祖文皇帝御撰 國朝孫馮翼輯前有鳳卿
序及攷證九條按隋志新舊唐志俱載典論五卷
讀書志書錄解題通考宋志始不著錄則其佚已
久矣魏志本紀言帝好著述所論說垂百篇卽典
論鳳卿輯其逸簡祇存三十餘事以論文最爲全
篇因編于首是書在當時嘗刻于石與太學石經

並列故隋志別有石經典論一卷然石本六碑晉時已毀其四至宋而簡編並佚其見引于羣書者亦不外此一卷而已就此一卷核之記雜事者居多前志列之儒家已爲名不副實顧乃尊之爲經布之太學無亦妄相推崇耶

人物志三卷

墨海金壺本

魏劉邵撰北魏劉昶注

邵字孔才邯鄲人黃初中官散騎常侍正始中賜爵

關內侯

昶字延明熒煌人涼李暠時官儒林祭

酒沮渠蒙遜

平酒泉授祕書郎魏太武時又授樂

平從事中郎卷首題爲涼人誤也

四庫全書著錄隋志

名家作三

卷而不言是劉昶注新舊唐志

名家既載三卷之本

而復載劉昶注三卷讀書志書錄解題通志通考

惟載兩注三卷崇文目宋志所載俱不言及兩注大都卽有注本也其書凡九徵體別流業材理材能利害接識英雄八觀七繆效難釋爭十二篇宋阮逸序之稱其述性品之上下材質之兼偏研幽摘微一貫于道若度之長短權之輕重無銖銖蔽也大抵考諸行事而約人于中庸之域誠一家之善志也又稱是書博而暢辨而不肆非眾說之流也王者得之爲知人之鑑鑑士君子得之爲治性修身之楫楫其效不爲小矣

此本載阮逸序闕其名氏

蓋其學

雖出于名家尙不悖于儒家之旨也延明著書甚富存者惟有是注其注疏通大義不沾沾于訓詁

詞致簡括尙有輔嗣注老子元注莊遺意且併孔
才原序注之則又得平經學家法矣前又有朱公
序庠孔才延明兩記末有王三省後序文寬夫跋
三省寬夫亦皆宋人也明隆慶壬申鄭昱所刊猶
屬古本至萬厯甲申河閒劉用霖取其舊版而修
之文瀾閣本卽據劉本寫定此本亦從劉本校
梓冠以提要一篇漢魏叢書所收止有阮逸一
序而譌題晉人云

金樓子六卷

知不足齋叢書本

梁孝元皇帝御撰四庫全書著錄隋志新舊唐
志崇文目讀書志書錄解題通考宋志俱作十卷

其書至明代漸無傳本明人論著皆不及之焦氏
經籍志亦不過虛立其目耳惟永樂大典尙載其
文今館本卽據以錄出分爲六卷凡與王箴戒后
妃終制戒子聚書二南五霸說蕃立言著書捷對
志怪雜記自序十四篇其二南五霸篇僅存三條
皆與說蕃篇同疑說蕃篇中有二南五霸之事後
人因誤分之非原有之目也觀晁氏止稱書十篇
是以此本僅存其目而刪其文焉然晁氏惟舉箴
戒立言志怪雜說卽雜記自敘著書聚書七目餘三
篇不舉其目僅云論歷代興亡之迹當卽指興王
后妃終制戒子說蕃諸篇爾皆雜記古今聞見而

于歷代盛衰治亂興亡之際尤能綜括始末以資
法戒所徵引者亦多周秦古書非今所及見則更
有裨于考證矣其本書自序篇止紀雜事而不及
著述故前復有自序序稱合纂開闢已來至平耳
目所接卽以先生爲號名曰金樓子蓋士安之元
晏稚川之抱朴者焉乃其在藩時所作故宋志尙
題湘東繹云鮑渌飲從歷城周書倉 永年得永樂
大典輯錄本重校付梓末有乾隆辛丑汪龍莊
祖書後說邪止節錄一卷皆是本所已具云

新論十卷

漢魏叢書本

舊題梁劉勰撰實北齊劉晝撰也

晝字孔昭渤海阜城人

四庫全書著錄作劉子隋志不載新舊唐志始載
之作劉勰撰崇文目讀書志宋志俱作三卷崇文
目闕其撰人晁氏始題齊劉晝撰宋志同讀書附
志書錄解題通考俱作五卷亦俱題劉晝撰晁氏
云唐袁政注此處脫孝字序誤爲注凡五十五篇言修心治

身之道而辭頗俗薄或以爲劉勰或以爲劉孝標
未知孰是陳氏云袁孝政爲序序云晝傷己不遇
天下陵遲播遷江表故作此書時人莫知謂爲劉
勰或曰劉歆劉孝標作孝政之言云爾終不知晝
爲何代人其書近出傳記無稱莫詳其始末不知
何以知其名晝而字孔昭也按劉子確是唐以前

古書已見隋志雜家注中

楊偉時務論十二卷下引梁有劉子十卷亡卽

七錄也

當時作史者必聞其緒言故九流一篇與隋

志子部所論相同特南北混一之際其書偶佚至

唐代復出耳孝政定爲劉晝孔昭必有所據故玉

海

三五十

亦從之二唐志俱題劉勰撰者卽孝政所

謂時人莫知謂爲劉勰劉孝標也勰所著文心雕

龍體格旣異宗旨亦殊惟孔昭號稱名儒是書雜

論治國修身之道不失爲儒者之言北史本傳有

孔昭所撰金箱壁言或卽此書歟至播遷江表之

說與傳不合安知非史冊失載卽據傳稱其綴輯

詞藻言甚古拙並疑此書非其所能亦非篤論何

者以魏伯起之文而徐孝穆曰爲之藏拙盧子行
辟元卿之文而庾子山少解把筆何怪于孔昭蓋
其才本不嫻詩賦旣爲邢魏所笑耳食者遂過甚
其辭耳未見其不能著書也諸家書目皆云劉子
是本題爲新論者蓋程榮何鏐輩誤改從桓譚之
書名書本十卷或云三卷或云五卷則分併之故亦
無歧異也而王述庵師春融堂集有是書跋斷爲
明人僞撰竟與僞申培詩說子貢易詩傳天祿閣
外史同類並稱豈其然乎

顏氏家訓七卷

知不足齋叢書本

隋顏之推撰

之推字介珉瑯琊新沂人仕梁爲散騎侍郎入齊再遷黃門侍郎周大象末

爲御史上士隋開皇中太子召爲學士
是本尙題北齊官職蓋據作書之時也 四庫全

書著錄作二卷蓋從明人刊本也隋志不載舊唐

志儒始載家訓七卷顏之推撰新唐志儒家作顏氏

家訓崇文總目小說通志儒書錄解題俱同讀書

志儒通考儒宋志儒俱無顏氏二字殆省文爾其

書凡序致教子兄弟後娶治家風操慕賢勉學文

章名實涉務省事止足誠兵養生歸心書證音辭

雜藝終制五十篇陳氏稱古今家訓以此爲祖然

其書頗崇尙釋氏云今觀其書惟歸心一篇深明

佛法非專以儒理立言其全書皆本之孝弟推以

事君上處朋友鄉黨之間其歸要不紊于六經故

舊史皆入之儒家終不以一眚掩也而書證音辭
二篇辨析援證咸有根據尤爲今之小學家所取
資其以家訓名書雖辭質義直而旁貫百氏白當
啟悟來世不但可訓其子思魯慙楚輩而已卷首
有宋人序不著名氏後有淳熙庚子嘉興沈揆序
并有攷證二十三條附于卷末又有宋本校刊名
銜錢氏讀書敏求記三載有宋鈔本鮑渌飲卽據
以付梓趙敬夫職明注本又據鮑本校正加入北
齊書文苑本傳盧抱經文昭爲之序并刊入抱經
堂叢書于是學者爭棄鮑本競從趙注本焉說邠
所收者係節本 漢魏叢書本併作二卷卽提要

所謂江西巡撫采進本也

長短經九卷

讀畫齋叢書本

唐趙蕤撰

蕤字太賓梓州郫縣人開元中召之不赴

四庫全書著錄

新唐志載趙蕤長短要術十卷通志宋志俱同惟宋志作九卷與今本合讀書志通考俱作長短經十卷前有自序稱儒者溺于所聞不知王霸殊略故敘以長短術以經綸通變者捫立題目總六十有三篇合爲十卷名曰長短經是長短經乃此書本名爲卷十爲篇六十三其作長短要術者當因敘以長短術語而妄增一要字以爲書名也晁氏云蕤博學韜鈴長于經世論王伯機權正變之術

第十卷載陰謀家本闕今存者六十四篇按晁氏所述篇數與今本合其所見本實止九卷而標爲十卷者蒙其自序及唐志之數也宋志作九卷者卽據見存本而載之也惟其書已亡一卷而反增多一篇疑其自序或傳寫之譌爾卷一爲文上凡八篇卷二爲文中凡四篇卷三爲文下亦四篇卷四爲霸紀上止一篇卷五爲霸紀中亦一篇卷六爲霸紀下亦一篇卷七爲權譏凡二篇卷八爲雜說凡十九篇卷九爲兵權凡二十四篇計之卻得六十四篇每篇各有標目并自爲之敘極詳大旨在乎寧固根蒂革易時弊興亡治亂具載諸篇爲

沿襲之遠圖作經濟之至道焉然短長爲戰國策
之別稱大賓以縱橫之學術談儒門之經濟故命
名取諸此而雜采羣言又絕似呂覽淮南也乾隆
辛丑鮑渌飲以吳氏拜經樓寫本屬周琴厓廣業
是正于是譌者改之闕者補之疑者證之兩通者
仍之雖不能悉合庶可上口矣渌飲卽以其本爲
顧策厓刊入叢書冠以提要一篇而琴厓爲之跋

兩同書二卷

廣祝笈本

唐羅隱撰

隱字昭諫新城人本名橫以十舉不中第乃更名朱溫纂唐以諫議大夫召不

應後仕吳越爲錢塘令
歷遷諫議大夫給事中

四庫全書著錄崇文目

讀書志書錄解題通考宋志俱載之惟陳氏上有

祝融子三字不著名氏稱中興書目云唐吳筠撰
唐藝文志同但入小說類采孔老爲內外十篇祝
融者謂鬻子爲諸子之首也余謂唐志小說家載吳

筠兩同書一卷而不及羅氏書蓋偶遺之崇文目

原釋云采孔老之書著爲內外十篇以老子修身

之說爲內孔子治世之道爲外會其旨而同元見通

考引其小說類又別載吳氏一卷則明是兩書矣宗

志亦別載吳氏書二卷雖與羅氏書同在雜家而

分爲二書殊較陳氏爲分明陳氏所載稱祝融子

者更不知其所據何本也晁氏謂兩同書取兩者

同出而異名之意竊謂晁說非也攷晉書阮瞻傳

載王戎問曰聖人貴名教老莊明自然其旨同異
瞻曰將無同昭諫蓋取此義以名書云其書上卷
凡貴賤強弱損益敬慢厚薄五篇皆歸本于老子
之言下卷凡理亂得失真偽同異愛憎五篇皆歸
本于孔子之言卷末有關文前有吳越備史本傳
及姚叔祥士彝跋跋謂其卽置格排比而持論雅
瞻足具五代一種著述也說郛亦收入併爲一卷
云

化書六卷 唐宋叢書本

南唐譚峭撰

峭字景昇爲唐國子司業
洙之子師事嵩山道士

四庫全

書著錄景昇曾以是書授宋齊王齊王攘爲己作

故亦謂之齊王崇文目尚題峭撰讀書志書錄
解題通志通考宋志則俱作齊王撰矣其書分六
篇曰道化凡二十三則曰術化凡二十一則曰德
化凡十六則曰仁化凡十七則曰食化凡十五則
曰儉化凡十七則每則各有標目惟道化篇首有
小序晁氏稱張文潛未嘗題其後云化書雖皆淺
機小數亦微有以見于黃老之所謂道德也文章
頗高簡有可喜者其言曰君子有奇知天下不親
雖聖人出斯言不廢云云蓋景昇本道士故大旨
多出于黃老而附會于儒言與羅昭諫兩同書殆
猶魯衛之政耳說郛廣祕笈鹽邑志林墨海金壺

均收入之

鄭堂讀書記卷五十二